

**Agong jalani rawatan, Sultan Kedah memangku
Malaysiakini.com
Jan 25, 2010**

Sultan Kedah Tuanku Abdul Halim Mu'adzam Shah berkenan melantik empat anggota Jemaah Pemangku Baginda bagi menjalankan tugas-tugas Sultan Kedah berkuatkuasa esok sehingga 25 Feb.

Anggota-anggota Jemaah Pemangku itu ialah adinda baginda, Tunku Bendahara Datuk Seri Tunku Anuar dilantik sebagai Yang Dipertua Jemaah Pemangku Sultan, tiga anggota Jemaah Pemangku Sultan ialah Tunku Temenggong Kedah Datuk Seri Tunku Sallehuddin, Tunku Laksamana Datuk Seri Tunku Abdul Hamid Thani dan puteri baginda, Tunku Panglima Besar, Datuk Seri Puteri Intaz Safinaz.

Keempat-empat anggota jemaah tersebut melafaz sumpah yang disaksikan Hakim Mahkamah Tinggi, Datuk Azman Hussin dan Ketua Hakim Syarie Datuk Wira Sheikh Yahya Jusoh.

Istiadat pelantikan yang berlangsung di Balai Penghadapan Istana Anak Bukit pagi tadi dilakukan kerana baginda akan menjalankan tugas sebagai pemangku Yang di-Pertuan Agong selama sebulan.

Yang di-Pertuan Agong Tuanku Mizan Zainal Abidin akan menjalani rawatan fisioterapi selama 21 hari di Medical Park, St.Hubertus, Bad Wiessee, Jerman.

Dalam titah baginda, Sultan Abdul Halim menyeru rakyat Kedah memberikan sokongan dan taat setia kepada keempat-empat Anggota Jemaah Pemangku yang dilantik sepanjang tempoh itu manakala Anggota Jemaah berkenaan pula diminta supaya menjalankan tugas dengan dedikasi dan adil untuk kepentingan rakyat.

- *Bernama*

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/122803>